

Dapli meds finansials per l'agricultura

Il cussegl naziunal ha chapientscha per ils purs

DA LUCAS DEPLAZES / ANR

■ **Il cussegl naziunal ha concedì als purs in credit da 13,792 milliardas francs per ils onns 2018–2021. En la debatta han ins demussà gronda chapientscha per noss purs.** Il cussegl federal vul metter a disposiziun a nossa agricultura 10,985 milliardas francs per ils onns 2018–2021. Quella summa è 3,7% u 514 milliuns francs pli bassa che las contribuziuns dals onns 2014–2017. La pli gronda cumpart pertutga ils pajaments directs che vegnan sbassads per 60 milliuns francs. Il cussegl federal fa allusiun al program per stabilisar las finanzas da la confederaziun. Tenor la giudicaziun d'Agroscope duess la summa totala per il sector agrar restar stabila durant ils proxims onns. La reduziun dals singuls manaschis purils vegn ad esser pli modesta che ils ultims onns. Persuenter quinta Agroscope cun ina leva sminuaziun dal dumber dals animals gronds.

La cumissiuon ha vulì conuscher las posiziuns da las diversass organisaziuns dal sector agrar e da l'economia avant d'entrar en la materia. Ina proposta da refusar la fatschenta ha ella cumbattì cun 20 vuschs cunter ina. En cumparaziun cun il sboz dal cussegl federal propoia la cumissiuon cun 14 cunter 10 vuschs d'augmentar la summa per 514 milliuns francs.

Ina situaziun difficila

En la debatta d'entrada ha *Leo Müller* (pdc/LU), il pledader da la cumissiuon, menziunà divers vuschs che han fatg attent a la situaziun difficila dals purs. Gronds quitads fa il pretsch bass per il latg. Bliers purs na sappian betg co financiar las investiziuns. Müller ha fatg attent a divers augments finansials massivs en divers secturs sco scolaziun, retschertga, (+80%) cultura (+26%), migraziun (+166%). *Markus Ritter* (pcd/SG) ha punctuà ch'ils pajaments directs sajan liads a prestaziuns concre-



Tar l'agricultura 2018 fin 2021 na vegnan betg stritgads ils 514 milliuns francs ch'il cussegl federal aveva proponi da spargnar.

FOTO M. RHYNER

tas e drizzads vers ina agricultura che protegia la natira. Ils ultims onns saja sa pegiurada la situaziun dals purs. *Duri Campell* (pbd/GR) conceda che la nova politica agrara haja purtà avantatgs per ils purs da muntogna. El vul far naginas midadas e rimnar vinavant experientschas cun la politica agrara, decretada per ils onns 2014–2017. Quatter onns saja memia curt per giuditgar il success da las stentas fixadas en la lescha. Impurtant per ils purs saja la segirezza da planisaziun per pudair far las investiziuns necessarias.

Ina minoritad sustegna la proposta dal cussegl federal e fa valair che il dumber dals manaschis saja sa reducì e la chareschia saja stabila. *Kathrin Bertschy* (vlb/BE) è dal parairi che er il sector agrar stoppia prestar ina contribuziun per stabilisar las finanzas da la confederaziun. *Beat Jans* (pss/BS) crititgescha la politica burgaisa che saja la culpa da la situaziun finanziaria da la confederaziun e menziuna la refurma fiscalia III che destgargia las interpresas

e l'augment dal meds per l'armada. Il president da la confederaziun *Johann Schneider-Ammann* conferma che las finamiras da la politica agrara sajan u realisadas u sin buna via. Per quest motiv na vul il cussegl federal far naginas midadas da la lescha agrara. Finamira resta da promover la protecziun da l'ambient, da reducir la lavur administrativa e da megliarar ils instruments per ils pajaments directs. Il cussegl federal è cunscent da la situaziun precara sin il martgà dal latg che munta ina gronda sfida per ils purs. La situaziun finanziaria da la confederaziun sforzia dentant il cussegl federal da prender divers mesiras per stabilisar las finanzas. Latiers stoppian tut ils secturs contribuir.

Cun 119 vuschs cunter 59 e 10 abstenziuns ha il cussegl naziunal approvà las propostas da sia cumissiuon ed augmentà la summa dals pajaments a l'agricultura per 514 milliuns. La fatschenta va uss al cussegl dals chantuns.